



**d`Basler Dybli**

**Schwelger**



SUNNEREEDLI 1987

# Schwelger Fasnacht, alles andere ist Beilage oder Gschissness mit Swissness

Du meinsch, e rächte Schwyzer z si?  
Denn lueg emoll in Di sälber dry!

Isch nit d' Mamme vom Babbe verwandt mit de Lappe  
und dr Babbe vo dr Mamme, e Ungar, e Gladde?  
Und dr Maa vo dr Dante isch heimlig, verstohle  
über die grieni Gränze ko uss Poole?  
Dängg au ans Gschiss vo Dym Unggle  
mit dr badische Gudrun im Dungle.  
Druss uuse isch denn dr Klaus-Dieter ko,  
Dy dütsche Cousin - au das ka vorko!  
Dr Gottlieb het doch nüünzähzwanzig  
sy Irma ghürote, e Meitli us Danzig.  
Und dr Armin het denn nüünzähdryssig  
gfunde d'Fraue im Elsass sin so flyssig.

Wie mit Dir, goots mit de Produgg.  
So dunggt uns das halt scho verruggt,  
was druff stoht, isch nit immer dinn –  
es isch e bitz, wie bi de Brieder Grimm!  
Fürs Marketing miech das halt Sinn  
und gläbberet in d'Kasse dütlig meh Gwinn!

Im Ganzen isch es denn scho truurig  
Und eergeret ys wirgglig schuurig,  
wenns Schwyzer Sackmässer duet us China ko  
und e Uhrwärk uss Taiwan am Morgestraich vieri schloh.  
Griegsch Schwyzerkääs uss em färne Sardinie  
und s Fleisch vo de Bündner kunnt uss Argentinie.  
(Kei Wunder kunnt dr Merz ins Stottere,  
wenn unseri urschwyzter Wärt dien verlottere!)

Sogar dr Willy Tell, dä Knüller,  
isch gschriebe vom DÜTSCHER Schiller,  
und d'Basler Läggerli, die Pracht,  
wärde vonere Zürchere gmacht!

Wo Schwyz druff stoht, isch Schwyz nit immer dinn.  
Do kunnt uns doch grad d Schwyzer Nazi in Sinn:  
Die goldigschte Fiessli heisse nüm Odermatt, Kuhn oder Müller,  
nei, dr Xhaka, Shaqiri, Dzemaili sinn unseri Knüller!  
Mit Schwyzerkrüz uf dr Bruscht, ganz ohni Luscht,  
singe sy wortlos d Nazi-Hymne, es isch e Fruscht!

Wenn mr in d Swissness scho die ganzi Wält integriere,  
wärs jetzt au Zyt, mit de Rambasse z fusioniere!  
E Fusion die kääm uns wirkligg grad gläge  
und mir hätte do überhaupt nüt drgäge.

Au mir Schwelger sinn gmischt, und das fascht global –  
nur Basler als Schwelger, das wär doch banal.  
E Hampfle vo uns sinn z Thärwil dehei,  
z Muttenz, z Rynach und z Münchestai.

Mir wohne vo Schöönebuech bis Amerika,  
drum, e Fusion, die fände mir ganz prima!  
Mit eme schwarze Baslerstab am Kaare  
würde mir alli viel lieber ummefahre!

Drum: D'Moral vo däm Zeedel isch:  
S'isch ALLES e bitz Vogel UND Fisch!

---

*Wotsch inere glatte Grubbe Fasnacht mache,  
so pack Dy Piccolo, Drummler und siebe Sache  
und kumm zu uns ko pfyffe, drummler,  
gsellig sy und bummler.*

*Bisch 40 gsi, eb Frau oder Maa,  
so lütsch ys am beschte grad hütt no schnäll aa:  
061 722 10 08 oder [www.schwelger.ch](http://www.schwelger.ch)*

---

*D Ladäärne-Uusstellig uff em Minschterplatz und  
d Waage- und Reggwisyte-Uusstellig bi dr Kasäärne  
sin vom Määntig znacht bis am Mittwoch demoorge!  
Deert und an de 3 Verkaufsständ (CINS) in dr Stadt ka  
men au alli Zeedel und Schnitzelbängg, d Blaggedde  
und dr Rädäbängg kaufe.  
Am Fritig und Samschtig, 22. und 23. Hornig isch  
Noochwuggswärbig vo dr 1. Lektion im Zält uff em Barfi.*

---

*D'Sunnereedli, wo mir verteile, loos,  
sin vo dr Beggerei Schneider an dr Clarastrass.*